

# Harga ikan, hasil laut naik

BH 25/11/23 M/S 14

**Kuala Kedah:** Harga ikan dan hasil laut naik sedikit disebabkan kesukaran dihadapi nelayan akibat peralihan fasa Monsun Timur Laut.

Kebanyakan peniaga ikan di pelantar ikan Kampung Seberang Kota di sini, mendakwa tangkapan ikan berkurangan akibat cuaca sejak dua bulan lalu, menyebabkan mereka terpaksa menjual harga tinggi berbanding biasa.

Tinjauan mendapati, kebanyakan peniaga menjual ikan merah, ikan tenggiri, gelama dan udang dengan harga masih wajar dengan bekalan.

Peniaga ikan, Melati Ladun, 40, berkata harga ikan yang dijual sebelum ini antara RM6 atau RM7 sekilogram terpaksa dijual antara RM10 hingga RM12 sekilogram bergantung pada saiz.

## Saiz ikan kecil

Katanya, harga murah RM3 hingga RM4 sekilogram memang ada tetapi saiz ikan terlalu kecil dan kebanyakan pelanggan memilih saiz sedang dan besar.

"Setiap hari kami jual apa yang nelayan tangkap. Ada sedikit dan ada banyak menyebabkan harga ikan tidak sama setiap hari.

"Kami dah banyak hari tak ada

ikan nak jual sebab ramai nelayan tak turun ke laut disebabkan ombak kuat," katanya di sini, semalam.

Sementara itu, peniaga lain, Khadijah Md Syah, 49, berkata, kekurangan ikan berlaku sejak penghujung September lalu dijangka berterusan hingga bulan depan.

Katanya, nelayan hanya memperoleh ikan sekadar yang mampu untuk dijual kepada pelanggan dengan harga peraih.

"Sekarang ini musim sotong tetapi dijual antara RM25 hingga RM35 sekilogram disebabkan musim tengkujuh," katanya.



Melati menunjukkan ikan yang dijual di pelantar ikan Kampung Seberang Kota, Kuala Kedah.  
(Foto Zuliati Zulkiffli/BH)